

REQUIEM PËR MISIONARIN

Misionari nuk vdes. Ai si orakull predikon për misionin, bashkon grigjën rreth idesë së shenjtë të misionit dhe shkon në Përjetësi, duke lënë pas vete shpirtin, frymën e misionit, që enden si një shkëndijë udhërrëfyese për breza të tëra.

Shpirti, mençuria dhe virtytet e tij rrezatojnë gjithmonë. Këto janë tiparet e misionarëve të mëdhenj të njerëzimit.

Historia na dëshmon një gjë të këtillë dhe ne besojmë.

Puna dhe veprimtaria e tij sa shumë i ngjason Profetit Biblik, Mojsiut. Ai nxori popullin e tij nga kthetrat sllave, por nuk e përjetoi pavarësinë.

Këto vlera të larta, universale ishin sublimuar në shkallë profetike, nga Presidenti shpirtëror dhe historik i Kosovës dr. Ibrahim Rugova.

Kosova, shqiptarët dhe bota e moderuar, nuk humbën vetëm një lider të thjeshtë. Kjo është humbja e prijësit, misionarit dhe ideatorit të të gjitha ndryshimeve të mëdha që ndodhën në Kosovë dhe më gjerë. Kjo është humbje e njeriut që ndikoi në ndryshimin e relacioneve në marrëdhëniet ndërkombëtare.

Magjia e filozofisë paqësore, kundrejt një politike vrasëse, që prodhonte vetëm shkatërrime dhe dhunë, ngazëlleu zemrat e sa e sa prijësve politikë të kombeve të mëdha. Është kjo magjia e fuqisë së paqes, pikërisht magji Prometheane që tregoi sa e fuqishme është kjo vlerë. Po ashtu, kjo fuqi bëri të qartë se sa të pafuqishme janë pengesat ndërkombëtare, kur ishte në pyetje domosdoja e mbrojtjes së Kosovës. Bota e tëra u rreshtua pas misionit të tij të përcaktuar jetësor. Dhe besoi në të.

Presidenti Rugova kaloi në amshim në vigjilje të jetësimit të realizmit të tij.

Po a nuk është ky fat i gjithë heronjve të mëdhenj!?

Si prodhim i filozofisë, urtësisë dhe strategjisë së tij, Kosova sot është më afër së kurrë sendërtimit të idealeve të saj.

Presidenti Rugova, herën e fundit kur ishte në Shqipëri, kur u përkul në gjunjë para heroit Kombëtar Gjergj Kastriotit-Skënderbeut tha: do t'i forcojmë aleancat me aleatet e të madhit Skënderbe.

Po a nuk është kjo magjia e fuqishme, me një vizion strategjik për të rikthyer kombin shqiptar në Familjen Perëndimore, me dinjitet të plotë?

In memoriam

Dr. Ibrahim Rugova ishte dhe do të mbetet ideator i një politikë moderne, jo vetëm shqiptare. Mjafton të riciklojmë në këto ditë dhembje, strategjinë e tij brilante, Kosova e Pavarur, Integrim në Strukturat Euroatlantike dhe Miqësi e përhershme me SHBA. Me urtësinë e tij, Presidenti në çdo takim me rëndësi, në çdo fjalim i ruante fjalët si visare të çmueshme dhe përshëndeste miqtë dhe liderët botërorë, që nga SHBA deri të Vatikani. Një vizion, që edhe nëpër shekuj duhet të ndiqet.

Presidenti Ibrahim Rugova nuk ishte, dhe nuk do të mbetet në kujtesën tonë kombëtare dhe botërore, vetëm si lider i përmasave të thjeshta politike, që në botë janë me mijëra; në panteonin e vlerave të mëdha, figura e tij hyn mbi të gjitha me dimensionet e një mendimtari të madh prej politikani, një iluminist që mishëroi dimensionet etike me ato politike, një personalitet me shpirt të gjerë dhe human, një dijetar i madh i shkencave albanologjike dhe një kritik letrar me dije enciklopedike, një shpirt rilindës- dhunti këto të cilat diti mrekullisht t'i kanalizojë në të mirë të idesë së Demokracisë, Lirisë, Pavarësisë dhe Integriteteve. Objektiva të rrugëtimeve të tij dy dekadëshe në krye të Kosovës. Në këto vite, forca shpirtërore e programit të tij, mbi të gjitha virtyti i lart i tij, bëri që gjithë bota përparimtare Perëndimore të dalë në anën e Kosovës. Një precedent i papërsëritshëm. Dhe një madhështi prej Misionari.

Në një betejë të rëndë, me sfida të rrezikshme, Ibrahim Rugova niset me besimin e tij, si një forcë shtytëse, me dijen e tij, si një pasuri, që i dha mundësi për të argumentuar një kauzë, me përcaktimin e tij të pa alternativë, si virtyt i pashoq që u admirua nga gjithë bota e civilizuar.

Janë këto virtyte dhe vlera kolosale që këtij njeriu i japin përmasa universale.

Në rajonin e Europës Juglindore, portreti i fuqishëm dhe shumëdimensional i Dr. Rugovës, me vizionet e një dijetari të madh dhe me sensin e një profeti, filluan ta trandin ideologjinë famëkeqe komuniste dhe të hapin shkëndijat e para të vlerave të demokracisë.

Sa vlerë sublime!

Në këtë rrugë, dr. Ibrahim Rugova u nis tamam si prijës, misionar e profet. Me urtësinë Sokratiane, me dashurinë për atdheun, të frymëzuar nga modeli dhe ati i tij shpirtëror dhe intelektual, Pjetër Bogdani, së cilit ia kushtoj një pjesë të punës intelektuale; i frymëzuar nga vlerat e filozofisë jodhunore të njohura në botë dhe të përfaqësuar përmes

In memoriam

Gandit, me të cilin ai u krahasua me të drejtë, Rugova u bë Ikona e Shqiptarëve dhe e botës së përparuar në këto dy dekada.

Duke qenë krenar se i përkiste atdheut të të madhit Gjergj Kastriotit- Skënderbeu, të së madhes Nënë Tereza, ai asimiloi dijen dhe guximin dhe besimin, me zërin e thellë të ndërgjegjes kombëtare dhe tundi pluhurin shekullor që kishte mbërthyer qenien shqiptare. Filloi t'i rikthej dinjitetin shqiptar; të rilidhë ato aleanca të vjetra me aleatët e figurës markante, Gjergj Kastrioti- Skënderbeut.

Këtë mision e realizoi.

Presidenti Rugova ishte, është dhe do të mbetet Hero, ashtu siç njihen në histori heronjtë e mëdhenj, të cilëve njerëzimi edhe sot u beson: ai është një hero sepse politikës i dha shpirt artistik, angazhimeve kombëtare u dha dimensione universale. Si i tillë personaliteti i tij do të jete i papërsëritshëm; sepse heronjtë janë Një, dhe vetëm si të këtillë kanë kuptim; nuk do të kishte kuptim që civilizimi ynë të kishte dy Dante Aligera, dy Gjergj Kastrioti, dy Pjeter Bodana, dy Shekspira, dy Nënë Tereza, dy Papa Gjon Pali II, dy Ibrahim Rugova. Këta në histori mbesin të vetëm, pa shëmbëlltyra. Si të këtillë janë unikalë dhe shpirtra që udhërrëfejnë grigjën.

Shekujt rrallë prodhojnë heronj të tilla përmasave.

Ndërsa shqiptarët në fund shekullin XX dhe fillim shekullin XXI patëm fatin t'ia japin botes Nene Terezën dhe Ibrahim Rugovën.

Ndjehemi krenar që e patëm dhe të pikëlluar që iku, në kohën kur na duhej aq shumë. Por ne i besojmë misionit të tij.

Filozofia politike, kulturore e Presidentit të Kosovës për jetë të jetëve do të mbetet model për ne. Sepse ajo është mishëruar në çdo zemër të shqiptarit, ka rrjedhur dhe rrjedhë nëpër dejtë e tij, dhe ka frymëzuar zemrat për një përcaktim, besim në të ardhmen.

Pushoftë ne paqe shpirti i tij fisnik, human dhe universal.

Amen